

武溪集

附余襄公奏議

郝魯題



武溪集卷第十三

工部尚書充集賢院學士贈尚書左僕射累贈
少師謚襄公余靖

判詞下

丁爲大夫薦而不祭或責其不孝辭云未
給圭田

羔羊有位姑務奉先田祿未頒則當殺禮志不愆於
率義理亦貴於從宜丁一命方榮十倫尤闕班超表
著祭當取於首時地薄都家薦乃從於仲月儀雖偏
下事貴舉中且圭潔取名尚闕容於百畝而博碩爲

用難備數於三牲豈故廢於烝嘗蓋有差於爵秩况
國章具舉固已辨於等威家廟致豐詎敢踰於名位
宜許率常之節勿貽忝祖之譏享以豚肩從鄙晏嬰
之隘陳之羊饋豈傷屈建之賢未全大夫之恩何切
庶人之誚有嚴籩豆苟殊豐昵之嫌無取棗盛當採
薦新之制亦猶行古寧以他規

乙為將兵士寒餒乞襦乙不之與或責其
不撫士卒辭云人臣無私施

輕財撫士雖得衆心散物擅恩恐非臣節將舉即戎
之責須存許國之誠乙也黃石貽謀漢壇膺寄飄風

冽冽方當隋指之寒被練將將忽有乞襦之者賢哉
臨事展矣能謨志在恤人誠合矜其凍餒美當歸上
豈宜奪彼慈仁自敦御下之方將教尊君之禮絕甘
分少固宜推彼赤心別嫌明微何必行其小惠縱使
求之不得我乃思而無邪散漢將之黃金雖聞大略
均楚師之挾纊蓋自溫言憫一夫未足稱賢存大義
故能和衆下車濟涉子產所以貽譏在笥絕私仲達
於焉見賞不敢專也可以事君雖無與之不失其正
乙春田火弊或告其暴物辭云獻禽以祭

社

啓蟄布和誠憂害物萊田展禮寧廢獻禽事未悖於
天時理蓋勤於事典乙素推卓識頗達舊章因農隙
以備儀順春蒐而行古下綏止殺圍必戒於掩羣揚
炬弊略義將存於擇孕蓋取順天之制寧同暴殄之
威乾豆是求克廟庖而有品青陽式屆伸地道以何
慙止車用協於周官艾蘭聿符於魯道雖區萌既達
須行太皞之仁而麋郊無傷奚爽虞人之職縱國門
之將禁在野禮之必行原隰未耕方及焚萊之候置
罟暫徃終非委獸之徒旣薦以松之神式協除苗之
害因蒐狩以習武自有邦儀戒馳騁之發狂未羞古

訓克比獻鳩之度無愆配稷之容

丙舉盜以為公臣或非之辭云可人也所
遊僻耳

殖財斯濫誠曰非賢染惡可矜奚傷見舉未爽援能
之道庶臻遷善之風丙識達惟精名光則哲爾將喻
利既結黨於蕉蒲我務擇才故取節於葑菲跡雖殊
於疾惡志所貴於激貪所遊弗近於正人縱乖積習
善誘必成於佳器亦可甄收况多能而是求諒一青
而何掩陳太丘贈縑致悔遂絕貪民戴若思投劔改
容卒為雅士庶有期於折節寧無謂以惠姦苟非逸

群之材奚勝籲俊之舉不須求備管庫自可同升勿
謂難知奴虜猶聞見擢儻能旌別庶免滯淹行匪固
窮誠愧蘭雍之視善當必用無輕管仲之謀亦冀從
權末為失選

甲塋讐人之妻或責其不義辭云臧其可
臧葬其可葬

執兵有報睚眦既除委骨無歸瘞埋何爽雖疚心於
雪我難取諂於非仁甲智妙見機志先行古齊襄自
立已雪九世之仇紀婦何辜方崇四尺之墓且勵精
於刷耻遂順變以從權釋憾是圖患雖深於側目遺

駭苟棄禍豈及於齊眉徒有切於忘生固未宜於遷
怒義士切齒漢俠誠務於遺身婦人僵尸魯史嘗譏
於非禮姑存大節無愧責言況乎損怨爲忠爰著作
威之誠益仇非智當從敵惠之謀矧異枕戈之人那
傷掩骼之化復讐因病尚耻非夫加禮既亡胡爲不
義公羊可採青烏必行

甲授田不入國征里尹責之辭云加田

賦均三壤必入地征賞有加田豈同民筭式舉優賢
之典盍寬量歲之科甲貴列命夫名高國士分地之
利祿均既啓於都家食土之毛功懋復頒於畎畝何

哉里尹憐彼邦經稅熟貢新雖欲歸其王府方輸錯
出寧宜及彼圭田既異任民之居盍視節財之式奠
什一之賦爾誠務於徇公取三百之禾我蓋因於褒
德當遵古制無亂彝章本殊食菜之榮自分公邑復
異連阡之富止實私囊賜既表於主恩貢難從於吏
議指膏腴而固請况非王翦之謀美勲勞之所加宜
守周公之法式期勸善當許免征

乙為刺史術者告將有火災請用瓊羊以
穰之乙不許或告其愛寶棄民辭云天道
遠

政經勉順誠務恤災天道淵微寧先惑衆自得安邦
之術誰興愛寶之譏乙也任重股肱憂分宵旰誠每
敦於亮直志靡尚於竒表執技之徒視祲遽稱於星
變先時而脩奠玉請禳於火妖既務宣風寧從語恠
雖鬱攸之氣將深徹屋之虞而幽榮之儀曷容非鬼
之祀矧條教之斯職當噐識以攸先王商正議於水
災民憂自息劉劭抗詞於日蝕軋象焉知固宜求福
不回式昭非禮勿動若事存萌漸弗絕本於訛言即
害有流行恐誘民於左道儻責躬而未至雖致享以
何為塗潦可防當思廉范之教權竿不用未傷子產

之賢編氓可使由之太守斯得之矣縱違裨竈之辯
終免鄭人之憂

丙濟君之難賞之不受曰非爲身也或責
其矯

臨危奮命可謂盡忠辭賞逃榮何傷索已勇旣稱於
排難志且異於飭非丙也位列王臣才標國幹推誠
可以貫白日吐氣可以截飛霓竭以股肱拯綴旒於
將墜昌其鋒鏑示勁草以彌堅當秉節以無渝諒殺
身而何懼疇其爵邑將酌汗馬之勞棄彼利名遂返
屠羊之業蓋濟君而是切豈徼賞以爲心董安于不

尚戰功固慙淮疾介之推靡貪天力爰比竊財始隆報
國之謀終獲退身之美斬肩是衛書竹帛以何慙成命既辭雖
茅土而奚貴自高淡泊孰謂矯誣魯連能下於遼城寧邀縶
組申胥再安於楚國無取執圭忠義可嘉撫讓那爽
乙爲政請隳都城譏其無備辭云都城不
過百雉

政在而益榮豈多備城苟過制何謂弱枝爰啓見機
之謀當許復隍之請乙器能高世忠亮拔群方推許
國之忠遽展濟時之略以謂金湯作固誠多藩屏之
功控帶相高必啓寇戎之害式陳良筭允叶明謀庇

民無假於深池頽墻頽填於濬洫且赫連定霸雖增
蒸土之勞士焉知權寧慎賓薪之役深詳得失妙察
興衰縱墨翟多能九攻聞解帶之術而鄭丹遠識五
大有在邊之譏蓋虞乎讐必保焉盍循乎古之制也
今京不度在百雉以貽憂夫魯有初諒三都之必毀
允合仲尼之志何慙由也之忠

甲父在而受車馬之賜或責其違禮辭云
崇君命也

爵祿有制當避父尊車服所旌難廢君命恩苟推於
懋賞禮未爽於從宜甲也噐幹淳深識局淵懿趨庭

承訓既盡綵衣之歡報國成功遂膺先路之賜遽聞
譏刺當體謀惟古者襲爵於父兄故當殺禮今也擇
材於俊乂豈限常科博古所貴於知今達禮亦宜於
察變向魑無祿而多馬誠紊國章張酺有位而賜車
奚傷子道無拘介節式協大猷時既改於漢官事難
盡於周禮叔孫以葬平子雖欲妄詞石建及門當代
未聞致誚但守一經之教寧懷駟馬之嫌况親在而
益榮豈位高而見怒

歲有札荒刺史欲移其民縣令云民有所
守不可移刺史不許

歲功不順誠貴利遷民守有常固難遠徙雖舉恤災
之政必存從俗之謀眷彼編氓處茲列郡札瘥爲梗
當天癘之流行旱勞多傷致地財之耗斲蓄欠九年
之用食憂三鬴之艱竹符以適彼樂郊庶推恩於拯
救蒲宰以越在他境恐成弊於流庸皆懷恤下之心
當體濟時之道減其漕運彼旣切於移民守以封疆
此固請於歸粟雖周官之備紀在唐令以兼明卿有
寬間當徙家而必募地居雄望俾減戶以誠難薄征
固可以撫毗荒政不專於就賤晉國舉郇瑕之壤雖
喜近甸魏王移河內之人亦譏罪歲故知拯患必務

從宜

乙居草澤被召到都謁見不拜或責其失
禮辭云禮者忠信之薄吾以忠信奉上天

韜光絕俗則全高尚之風應聘趨朝必順尊卑之序
雖凝情於方外難失卽於君前苟亡九拜之勞是慢
五常之教乙鑿坏曠達築室逍遙擇豹霧以深藏緘
鶴書而屢降沈冥谷口旣祗命於軟輪咫尺天威遽
抗容於文陛務誇誕而廢禮忘盤辟以致恭問以辨
之徒云忠信之薄必有尊也柰失朝廷之儀辭旣妄
興義將安取若隱而未見固當高蹈於山林且賁然

宋思宣宜長揖於君父縱曰遺榮於軒冕其如被旨
於絲綸昔周亞夫之御戎徒矜介士蘇子卿之秉節
止對筆于未聞謁見之初全微拜起之度許由洗耳
雖輕萬乘之權盧鴻好名已悖四維之道宜從片罷
用肅威儀

丁行堂贈人告其左道辭云古禮

國難藏事式期毆疫堂贈肆儀孰稱疑衆蓋取順時
之禮無貽失節之譏丁也識局該明事機詳練礫牲
致用畢春氣於九門執芻備容逐嘯神於四裔何哉
致諾曾莫表微蓋示訖於歲功亦猶行於古道執戈